

《瑜伽 96》

《雜阿含經卷 16》

(四四四) # 似轉

[0114c27] 如是我聞：

[0114c27] 一時，佛住舍衛國祇樹給孤獨園。

[0114c28] 爾時，世尊告諸比丘：「譬如眼藥丸，深廣一由旬，若有士夫取此藥丸，界界安置，能速令盡，於彼界界，不得其邊。當知諸界，其數無量。是故，比丘！當善界學，善種種界，當如是學。」

[0115a03] 佛說此經已，諸比丘聞佛所說，歡喜奉行。

(四四五)

[0115a05] 如是我聞：

[0115a05] 一時，佛住舍衛國祇樹給孤獨園。

[0115a06] 爾時，世尊告諸比丘：「眾生常與界俱，與界和合。云何眾生常與界俱？謂眾生行不善心時與不善界俱？善心時與善界俱，勝心時與勝界俱，鄙心時與鄙界俱。是故，諸比丘！當作是學，善種種界。」

[0115a10] 佛說是經已，諸比丘聞佛所說，歡喜奉行。

(四四六)

[0115a12] 如是我聞：

[0115a12] 一時，佛住舍衛國祇樹給孤獨園。

[0115a13] 爾時，世尊告諸比丘……廣說如上。差別者，即說偈言：

「常會故常生， 相離生則斷， 如人執小木， 而入於巨海，
人木則俱沒， 懈怠俱亦然。
當離於懈怠， 卑劣之精進， 賢聖不懈怠， 安住於遠離。
慇懃精進禪， 超度生死流， 膠漆得其素， 火得風熾然。
珂乳則同色， 眾生與界俱， 相似共和合， 增長亦復然。」

(四四七)

[0115a24] 如是我聞：

[0115a24] 一時，佛住王舍城迦蘭陀竹園。

[0115a25] 爾時，世尊告諸比丘：「眾生常與界俱，與界和合。云何與界俱？謂眾生不善心時與不善界俱，善心時與善界俱，鄙心時與鄙界俱，勝心時與勝界

俱。

[0115a28] 「時，尊者橋陳如與眾多比丘於近處經行，一切皆是上座多聞大德，出家已久，具修梵行。

[0115b01] 「復有尊者大迦葉與眾多比丘於近處經行，一切皆是少欲知足，[5]頭陀苦行，不畜遺餘。

[0115b03] 「尊者舍利弗與眾多比丘於近處經行，一切皆是大智辯才。

[0115b05] 「時，尊者大目犍連與眾多比丘於近處經行，一切皆是神通大力。

[0115b06] 「時，阿那律陀與眾多比丘於近處經行，一切皆是天眼明徹。

[0115b08] 「時，尊者二十億耳與眾多比丘於近處經行，一切皆是勇猛精進，專勤修行者。

[0115b10] 「時，尊者陀驪與眾多比丘於近處經行，一切皆是能為大眾修供具者。

[0115b11] 「時，尊者優波離與眾多比丘於近處經行，一切皆是通達律行。

[0115b13] 「時，尊者富樓那與眾多比丘於近處經行，皆是辯才善說法者。

[0115b14] 「時，尊者迦旃延與眾多比丘於近處經行，一切皆能分別諸經，善說法相。

時，尊者阿難與眾多比丘於近處經行，一切皆是多聞總持。

[0115b17] 「時，尊者羅睺羅與眾多比丘於近處經行，一切皆是善持律行。

[0115b19] 「時，提婆達多與眾多比丘於近處經行，一切皆是習眾惡行，是名比丘常與界俱，與界和合，是故，諸比丘！當善分別種種諸界。」

[0115b22] 佛說是經時。諸比丘聞佛所說，歡喜奉行。

（四四八）

[0115b24] 如是我聞：

[0115b24] 一時，佛住王舍城迦蘭陀竹園……如上廣說已，即說偈言：

「常會故常生， 相離生則斷， 如人執小木， 而入於巨海，
人木則俱沒， 懈怠俱亦然。
當離於懈怠， 卑劣之精進， 賢聖不懈怠， 安住於遠離。
慇懃精進禪， 超度生死流， 膠漆得其素， 火得風熾然。
珂乳則同色， 眾生與界俱， 相似共和合， 增長亦復然。」

（四四九）

[0115c06] 如是我聞：

[0115c06] 一時，佛住舍衛國祇樹給孤獨園。

[0115c07] 爾時，世尊告諸比丘：「眾生常與界俱，與界和合……」如是廣說，

乃至「勝心生時與勝界俱，鄙心生時與鄙界俱，殺生時與殺界俱，盜姪、妄語、飲酒心時，與，飲酒界俱；不殺生時與不殺界俱，不盜、不姪、不妄語、不飲酒，與，不飲酒界俱。是故，諸比丘！當善分別種種界。」

[0115c13] 佛說是經已，諸比丘聞佛所說，歡喜奉行。

（四五〇）#三求

[0115c15] 如是我聞：

[0115c15] 一時，佛住舍衛國祇樹給孤獨園。

[0115c16] 爾時，世尊告諸比丘：「眾生常與界俱，與界和合。不信時與不信界俱，犯戒時與犯戒界俱，無慚無愧時與無慚無愧界俱；信心時與信界俱，持戒時與持戒界俱，慚愧心時與慚愧界俱。是故，諸比丘！當善分別種種諸界。」

[0115c21] 佛說是經已，諸比丘聞佛所說，歡喜奉行。

[0115c23] 如信、不信。如是精進、不精進，失念、不失念，正受、不正受，多聞、少聞，慳者、施者，惡慧、善慧，難養、易養，難滿、易滿，多欲、少欲，知足、不知足，攝受、不攝受界俱，如上經。如是廣說。

（四五一）#總義

[0115c27] 如是我聞：

[0115c27] 一時，佛住舍衛國祇樹給孤獨園。

[0115c28] 爾時，世尊告諸比丘：「我今當說種種諸界。諦聽，善思，當為汝說。云何為種種界？謂眼界、色界、眼識界，耳界、聲界、耳識界，鼻界、香界、鼻識界，舌界、味界、舌識界，身界、觸界、身識界，眼界、法界、意識界，是名種種界。」

[0116a03] 佛說是經已，諸比丘聞佛所說，歡喜奉行。

（四五二）

[0116a05] 如是我聞：

[0116a05] 一時，佛住舍衛國祇樹給孤獨園。

[0116a06] 爾時，世尊告諸比丘：「緣種種界生種種觸，緣種種觸生種種受，緣種種受生種種愛。云何種種界？謂十八界，眼界、色界、眼識界，乃至眼界、法界、意識界，是名種種界。」

[0116a09] 「云何緣種種界生種種觸，乃至云何緣種種受生種種愛？謂緣眼界生

眼觸，緣眼觸生眼觸生受，緣眼觸生受生眼觸生愛。耳、鼻、舌、身、意界緣生意觸，緣意觸生意觸生受，緣意觸生受生意觸生愛。

[0116a14] 「諸比丘！非緣種種愛生種種受，非緣種種受生種種觸，非緣種種觸生種種界。要緣種種界生種種觸，緣種種觸生種種受，緣種種受生種種愛，是名比丘緣種種界生種種觸，緣種種觸生種種受，緣種種受生種種愛。」

[0116a20] 佛說此經已，諸比丘聞佛所說，歡喜奉行。

（四五三）

[0116a22] 如是我聞：

[0116a22] 一時，佛住舍衛國祇樹給孤獨園。

[0116a23] 爾時，世尊告諸比丘：「緣種種界生種種觸，緣種種觸生種種受，緣種種受生種種愛。云何種種界？謂十八界，眼界、色界、眼識界，乃至意界、法界、意識界，是名種種界。」

[0116a26] 「云何緣種種界生種種觸？緣種種觸生種種受？緣種種受生種種愛？謂緣眼界生眼觸，非緣眼觸生眼界，但緣眼界生眼觸；緣眼觸生眼受，非緣眼受生眼觸，但緣眼觸生眼受；緣眼受生眼愛，非緣眼愛生眼受，但緣眼受生眼愛。如是耳、鼻、舌、身、意界緣生意觸，非緣意觸生意界，但緣意界生意觸；緣意觸生意受，非緣意受生意觸，但緣意觸生意受；緣意受生意愛，非緣意愛生意受，但緣意受生意愛。」

[0116b07] 「是故，比丘！非緣種種愛生種種受，非緣種種受生種種觸，非緣種種觸生種種界；但緣種種界生種種觸，緣種種觸生種種受，緣種種受生種種愛，是名比丘當善分別種種界。」

[0116b12] 佛說是經已，諸比丘聞佛所說，歡喜奉行。

（四五四）

[0116b14] 如是我聞：

[0116b14] 一時，佛住舍衛國祇樹給孤獨園。

[0116b15] 爾時，世尊告諸比丘：「緣種種界生種種觸，緣種種觸生種種受，緣種種受生種種想，緣種種想生種種欲，緣種種欲生種種覺，緣種種覺生種種熱，緣種種熱生種種求。」

[0116b19] 「云何種種界？謂十八界，眼界，乃至法界。

[0116b20] 「云何緣種種界生種種觸？乃至緣種種熱生種種求？謂緣眼界生眼觸，緣眼觸生眼受，緣眼受生眼想，緣眼想生眼欲，緣眼欲生眼覺，緣眼覺生眼熱，緣眼熱生眼求。如是耳、鼻、舌、身、意界緣生意觸，緣意觸生意受，緣意受生意想，緣意想生意覺，緣意覺生意熱，緣意熱生意求，是名比丘緣種種界故生種種觸，乃至緣種種熱生種種求。

[0116b28] 「比丘！非緣種種求生種種熱，非緣種種熱生種種覺，非緣種種覺生種種想，非緣種種想生種種受，非緣種種受生種種觸，非緣種種觸生種種界，但緣種種界生種種觸，乃至緣種種熱生種種求。」

[0116c04] 佛說是經已，諸比丘聞佛所說，歡喜奉行。

（四五五）

[0125a06] 如是我聞：

[0125a06] 一時，佛住舍衛國祇樹給孤獨園。

[0125a07] 爾時，世尊告諸比丘：「緣界種種故生種種觸，緣種種觸生種種想，緣種種想生種種欲，緣種種欲生種種覺，緣種種覺生種種熱，緣種種熱生種種求。

[0125a11] 「云何種種界？謂十八界，眼界，乃至法界。

[0125a12] 「云何緣種種界生種種觸？云何？乃至緣種種熱生種種求？謂緣眼界生眼觸，非緣眼觸生眼界，但緣眼界生眼觸；非緣眼觸生眼想，非緣眼想生眼觸，但緣眼觸生眼想；緣眼想生眼欲，非緣眼欲生眼想，但緣眼想生眼欲；緣眼欲生眼覺，非緣眼覺生眼欲，但緣眼欲生眼覺；緣眼覺生眼熱，非緣眼熱生眼覺，但緣眼覺生眼熱；緣眼熱生眼求，非緣眼求生眼熱，但緣眼熱生眼求。

如是耳、鼻、舌、身、意界緣生意觸，乃至緣意熱生意求，亦如是廣說。是名比丘緣種種界生種種觸，乃至緣種種熱生種種求，非緣種種求生種種熱，乃至非緣種種觸生種種界，但緣種種界生種種觸，乃至緣種種熱生種種求。」

[0125a27] 佛說是經已，諸比丘聞佛所說，歡喜奉行。

[0125a29] 如內六入處，外六入處亦如是說。

《雜阿含經卷第十七》〈雜因誦第三品之五〉

(四五六) # 三七界相攝

[0116c12] [7]如是我聞：

[0116c12] 一時，佛住舍衛國祇樹給孤獨園。

[0116c13] 爾時，世尊告諸比丘：「有光界、淨界、無量空入處界、無量識入處界、無所有入處界、非想非非想入處界、有滅界。」

[0116c15] 時，有異比丘從座起，整衣服，稽首禮足，合掌白佛言：「世尊！彼光界、淨界、無量空入處界、無量識入處界、無所有入處界、非想非非想入處界、滅界。如此諸界，何因緣可知？」

[0116c19] 佛告比丘：「彼光界者，緣闇故可知。淨界緣不淨故可知。無量空入處界者，緣色故可知。無量識入處界者，緣內故可知。無所有入處界者，緣所有可知。非想非非想入處界者，緣有第一故可知。滅界者，緣有身可知。」

[0116c24] 諸比丘白佛言：「世尊！彼光界，乃至滅界，以何正受而得？」

[0116c26] 佛告比丘：「彼光界、淨界、無量空入處界、無量識入處界、無所有入處界，此諸界於自行正受而得。非想非非想入處界，於第一有正受而得。滅界者，於有身滅正受而得。」

[0117a01] 佛說此經已，諸比丘聞佛所說，歡喜奉行。

(四五七) # 見

[0117a03] 如是我聞：

[0117a03] 一時，佛住舍衛國東園鹿子母講堂。

[0117a04] 爾時，世尊晡時從禪覺，於講堂陰中敷座，於大眾前坐，說優檀那句，告諸比丘：「緣界故生說，非不界。緣界故生見，非不界。緣界故生想，非不界。緣下界，我說生下說、下見、下想、下思、下欲、下願、下士夫、下所作、下施設、下建立、下部分、下顯示、下受生。

如是中。如是勝界，緣勝界，我說彼生勝說、勝見、勝想、勝思、勝願、勝士夫、勝所作、勝施設、勝建立、勝部分、勝顯示、勝受生勝。」

[0117a12] 時，有婆迦利比丘在佛後執扇扇佛，白佛言：「世尊！若於三藐三佛陀起非三藐三佛陀見，彼見亦緣界而生耶？」

[0117a15] 佛告比丘：「於三藐三佛陀起非三藐三佛陀見，亦緣界而生，非不

界。所以者何？凡夫界者，是無明界，如我先說，緣下界生下說、下見，乃至下受生，中勝界生勝說、勝見，乃至勝受生。」

[0117a19] 佛說此經已，諸比丘聞佛所說，歡喜奉行。

（四五八）# 想

[0117a21] 如是我聞：

[0117a21] 一時，佛住舍衛國祇樹給孤獨園。

[0117a22] 爾時，世尊告諸比丘：「有因生欲想，非無因。有因生恚想、害想，非無因。

[0117a23] 「云何因生欲想？謂緣欲界也。緣欲界故，生欲想、欲欲、欲覺、欲熱、欲求。愚癡凡夫起欲求已，此眾生起三處邪，謂身、口、心。如是邪因緣故，現法苦住，有苦、有礙、有惱、有熱，身壞命終，生惡趣中，是名因緣生欲想。

[0117a28] 「云何因緣生恚想、害想？謂害界也。緣害界，生害想、害欲、害覺、害熱、害求，愚癡凡夫起害求已，此眾生起三處邪，謂身、口、心。起三處邪因緣已，現法苦住，有苦、有礙、有惱、有熱，身壞命終，生惡趣中，是名因緣生害想。

[0117b04] 「諸比丘！若諸沙門、婆羅門如是安於生，生危嶮想，不求捨離，不覺、不吐，彼則現法苦住，有苦、有礙、有惱、有熱，身壞命終，生惡趣中。譬如城邑聚落不遠有曠野，大火卒起，彼無有力能滅火者，當知彼諸野中眾生悉被火害。如是諸沙門、婆羅門安於生，生危嶮想，身壞命終，生惡趣中。

[0117b11] 「諸比丘！有因生出要想，非無因。云何有因生出要想？謂出要界，緣出要界，生出要想、出要欲、出要覺、出要熱、出要求，謂彼慧者出要求時，眾生三處生正，謂身、口、心，彼如是生正因緣已，現法樂住，不苦、不礙、不惱、不熱，身壞命終，生善趣中，是名因緣生出要想。

[0117b17] 「云何因緣生不恚、不害想？謂不害界也，不害界因緣生不害想、不害欲、不害覺、不害熱、不害求，彼慧者不害求時，眾生三處正，謂身、口、心。彼正因緣生已，現法樂住，不苦、不礙、不惱、不熱，身壞命終，生善趣中，是名因緣生不害想。

[0117b22] 「若諸沙門、婆羅門安於生，生不害想，不捨離、不覺、不吐，現法樂住，不苦、不礙、不惱、不熱，身壞命終，生善趣中。譬如城邑聚落邊有曠野，大火卒起，有人堪能手足滅火，當知彼諸眾生依草木者，悉不被害。

如是諸沙門、婆羅門安於生，生正想，不捨、不覺、不吐，現法樂住，不苦、不礙、不惱、不熱，身壞命終，生善趣中。」

[0117b29] 佛說此經已，諸比丘聞佛所說，歡喜奉行。

（四五九）# 希奇

[0117c02] 如是我聞：

[0117c02] 一時，佛住舍衛國祇樹給孤獨園。

[0117c03] 時，有婆羅門來詣佛所，與世尊面相慰勞已，於一面住，白佛言：「眾生非自作、非他作？」

[0117c05] 佛告婆羅門：「如是論者，我不與相見，汝今自來，而言我非自作、非他作？」

[0117c06] 婆羅門言：「云何？瞿曇！眾生為自作、為他作耶？」

[0117c08] 佛告婆羅門：「我今問汝，隨意答我。婆羅門！於意云何？有眾生方便界，令諸眾生知作方便耶？」

[0117c10] 婆羅門言：「瞿曇！有眾生方便界，令諸眾生知作方便也。」

[0117c11] 佛告婆羅門：「若有方便界，令諸眾生知有方便者，是則眾生自作、是則他作。婆羅門！於意云何？有眾生安住界、堅固界、出界、造作界，令彼眾生知有造作耶？」

[0117c15] 婆羅門白佛：「有眾生安住界、堅固界、出界、造作界，令諸眾生知有造作。」

[0117c17] 佛告婆羅門：「若彼安住界、堅固界、出界、造作界，令諸眾生知有造作者，是則眾生自作、是則他作。」

[0117c19] 婆羅門白佛：「有眾生自作、有他作，瞿曇！世間多事，今當請辭。」

[0117c20] 佛告婆羅門：「世間多事，宜知是時。」

[0117c21] 時，彼婆羅門聞佛所說，歡喜隨喜，從座起去。

（四六〇）# 差別性

[0117c23] 如是我聞：

[0117c23] 一時，佛住拘睺彌國瞿師羅園。

[0117c24] 爾時，瞿師羅長者詣尊者阿難所，禮尊者阿難足，退坐一面，白尊者

阿難：「所說種種界。云何為種種界？」

[0117c26] 尊者阿難告瞿師羅長者：「眼界異、色界異喜處，二因緣生識，三事和合生觸，又喜觸因緣生樂受。如是耳、鼻、舌、身、意、法，亦如是說。復次，長者！有異眼界、異色界憂處，二因緣生識，三事和合生苦觸，彼苦觸因緣生苦受。如是耳、鼻、舌、身、意、法，亦如是說。」

[0118a03] 「復次，長者！異眼界、異色界捨處，二因緣生識，三事和合生不苦不樂觸，不苦不樂觸因緣生不苦不樂受。如是耳、鼻、舌、身、意、法，亦如是說。」

[0118a06] 爾時，瞿師羅長者聞尊者阿難所說，歡喜隨喜，禮足而去。

（四六一）# 安立

[0118a08] 如是我聞：

[0118a08] 一時，佛住拘睺彌國瞿師羅園。

[0118a09] 爾時，瞿師羅長者詣尊者阿難所，稽首禮足，於一面坐。白尊者阿難：「所說種種界。云何為種種界？」

[0118a11] 尊者阿難告瞿師羅長者：「有三界。云何三？謂欲界、色界、無色界。」

[0118a12] 爾時，尊者阿難即說偈言：

「曉了於欲界， 色界亦復然， 捨一切有餘， 得無餘寂滅。
於身和合界， 永盡無餘證， 三耶三佛說， 無憂離垢句。」

[0118a18] 尊者阿難說是經已，瞿師羅長者歡喜隨喜，作禮而去。

（四六二）

[0118a20] 如是我聞：

[0118a20] 一時，佛住拘睺彌國瞿師羅園。

[0118a21] 爾時，瞿師羅長者詣尊者阿難所，稽首禮足，退坐一面，白尊者阿難：「所說種種界。云何名為種種界？」

[0118a23] 尊者阿難告瞿師羅長者：「有三界，色界、無色界、滅界，是名三界。」即說偈言：

「若色界眾生， 及住無色界， 不識滅界者， 還復受諸有。」

若斷於色界，不住無色界，滅界心解脫，永離於生死。」

[0118a30] 尊者阿難說是經已，瞿師羅長者歡喜隨喜，作禮而去。

(四六三)

[0118b02] 如是我聞：

[0118b02] 一時，佛住拘睺彌國瞿師羅園。

[0118b03] 爾時，瞿師羅長者詣尊者阿難所，稽首禮足，退坐一面，白尊者阿難：「所說種種界。云何為種種界？」

[0118b05] 尊者阿難答瞿師羅長者：「謂三種出界。云何三？謂從欲界出至色界，色界出至無色界、一切諸行一切思想滅界，是名三出界。」即說偈言：

「知從欲界出，超踰於色界，一切行寂滅，勤修正方便。
斷除一切愛，一切行滅盡，知一切有餘，不復轉還有。」

[0118b13] 尊者阿難說是經已，瞿師羅長者歡喜隨喜，作禮而去。

(四六四) # 寂靜

[0118b15] 如是我聞：

[0118b15] 一時，佛住拘睺彌國瞿師羅園。

[0118b16] 爾時，尊者阿難往詣上座上座名者所，詣已，恭敬問訊，問訊已，退坐一面，問上座上座名者言：「若比丘於空處、樹下、閑房思惟，當以何法專精思惟？」

[0118b19] 上座答言：「尊者阿難！於空處、樹下、閑房思惟者，當以二法專精思惟，所謂止、觀。」

[0118b21] 尊者阿難復問上座：「修習於止，多修習已，當何所成？修習於觀，多修習已，當何所成？」

[0118b23] 上座答言：「尊者阿難！修習於止，終成於觀，修習觀已，亦成於止。謂聖弟子止、觀俱修，得諸解脫界。」

[0118b25] 阿難復問上座：「云何諸解脫界？」

[0118b26] 上座答言：「尊者阿難！若斷界、無欲界、滅界，是名諸解脫界。」

[0118b27] 尊者阿難復問上座：「云何斷界？乃至滅界？」

[0118b28] 上座答言：「尊者阿難！斷一切行，是名斷界；斷除愛欲，是無欲

界，一切行滅，是名滅界。」

[0118c01] 時，尊者阿難聞上座所說，歡喜隨喜，往詣五百比丘所，恭敬問訊，退坐一面，白五百比丘言：「若比丘於空處、樹下、閑房思惟時，當以何法專精思惟？」

[0118c05] 時，五百比丘答尊者阿難：「當以二法專精思惟，乃至滅界，如上座所說。」

[0118c07] 時，尊者阿難聞五百比丘所說，歡喜隨喜，往詣佛所，稽首佛足，退坐一面，白佛言：「世尊！若比丘空處、樹下、閑房思惟，當以何法專精思惟？」

[0118c10] 佛告阿難：「若比丘空處、樹下、閑房思惟，當以二法專精思惟，乃至滅界，如五百比丘所說。」

[0118c12] 時，尊者阿難白佛言：「奇哉！世尊！大師及諸弟子皆悉同法、同句、同義、同味，我今詣上座名上座者，問如此義，亦以此義、此句、此味答我，如今世尊所說，我復詣五百比丘所，亦以此義、此句、此味而問，彼五百比丘亦以此義、此句、此味答，如今世尊所說。是故當知，師及弟子一切同法、同義、同句、同味。」

[0118c19] 佛告阿難：「汝知彼上座為何如比丘？」

[0118c20] 阿難白佛：「不知。世尊！」

[0118c20] 佛告阿難：「上座者是阿羅漢，諸漏已盡，已捨重擔，正智心善解脫，彼五百比丘亦皆如是。」

[0118c22] 佛說此經已，尊者阿難聞佛所說，歡喜奉行。

（四六五）# 愚夫

[0118c24] 如是我聞：

[0118c24] 一時，佛住王舍城迦蘭陀竹園。

[0118c25] 爾時，尊者羅睺羅詣世尊所，稽首禮足，退坐一面，白佛言：「世尊！云何知、云何見我此識身及外境界一切相，得無有我、我所見、我慢繫著使？」

[0118c28] 佛告羅睺羅：「諦聽，善思，當為汝說。羅睺羅！若比丘於所有地界，若過去、若未來、若現在，若內、若外，若麤、若細，若好、若醜，若

遠、若近，彼一切非我、不異我、不相在如實知，水界、火界、風界、空界、識界亦復如是。

[0119a04] 「羅睺羅！比丘如是知、如是見，於我此識身及外境界一切相，無有我、我所見、我慢繫著使。羅睺羅！若比丘於此識身及外境界一切相，無有我、我所見、我慢繫著使，是名斷愛縛諸結、斷諸愛、正慢無間等、究竟苦邊。」

[0119a09] 佛說此經已，尊者羅睺羅聞佛所說，歡喜奉行。

（四六六）# 自性 # 因緣

[0119a11] 如是我聞：

[0119a11] 一時，佛住王舍城迦蘭陀竹園。

[0119a12] 爾時，尊者羅睺羅往詣佛所，稽首禮足，退坐一面，白佛言：「世尊！云何知、云何見我此識身及外境界一切相，得無有我、我所見、我慢繫著使？」

[0119a15] 佛告羅睺羅：「有三受——苦受、樂受、不苦不樂受。此三受何因、何集、何生、何[3]轉？謂此三受，觸因、觸集、觸生、觸轉；彼彼觸因、彼彼受生，若彼彼觸滅，彼彼受亦滅、止、清涼、沒。如是知、如是見我此識及外境界一切相，得無有我、我所見、我慢繫著使。」

[0119a20] 佛說此經已，尊者羅睺羅聞佛所說，歡喜奉行。

（四六七）# 見

[0119a22] 如是我聞：

[0119a22] 一時，佛住王舍城迦蘭陀竹園。

[0119a23] 爾時，尊者羅睺羅往詣佛所，稽首禮足，退住一面，白佛言：「世尊！云何知、云何見我此識身及外境界一切相，得無有我、我所見、我慢繫著使？」

[0119a26] 佛告羅睺羅：「有三受，苦受、樂受、不苦不樂受。觀於樂受而作苦想，觀於苦受作劍刺想，觀不苦不樂受作無常想。若彼比丘觀於樂受而作苦想，觀於苦受作劍刺想，觀不苦不樂受作無常、滅想者，是名正見。」

[0119b02] 爾時，世尊即說偈言：

「觀樂作苦想， 苦受同劍刺， 於不苦不樂， 修無常滅想，
是則為比丘。 正見成就者， 寂滅安樂道， 住於最後邊，
永離諸煩惱， 摧伏眾魔軍。」

[0119b09] 佛說此經已，尊者羅睺羅聞佛所說，歡喜奉行。

(四六八) # 染

[0119b11] 如是我聞：

[0119b11] 一時，佛住王舍城迦蘭陀竹園。

[0119b12] 爾時，尊者羅睺羅往詣佛所，稽首佛足，退坐一面，白佛言：「世尊！云何知、云何見我此識身及外境界一切相，得無有我、我所見、我慢繫著使？」

[0119b15] 佛告羅睺羅：「有三受——苦受、樂受、不苦不樂受。觀於樂受，為斷樂受貪使故，於我所修梵行；斷苦受瞋恚使故，於我所修梵行；斷不苦不樂受癡使故，於我所修梵行。」

[0119b19] 「羅睺羅！若比丘樂受貪使已斷、已知，苦受恚使已斷、已知，不苦不樂受癡使已斷、已知者，是名比丘斷除愛欲縛、去諸結、慢無間等、究竟苦邊。」

[0119b22] 爾時，世尊即說偈言：

「樂受所受時， 則不知樂受， 貪使之所使， 不見出要道。
苦受所受時， 則不知苦受， 瞋恚使所使， 不見出要道。
不苦不樂受， 正覺之所說， 不善觀察者， 終不度彼岸。
比丘勤精進， 正知不動轉， 如此一切受， 慧者能覺知。
覺知諸受者， 現法盡諸漏， 明智者命終， 不墮於眾數。
眾數既已斷， 永處般涅槃。」

[0119c05] 佛說此經已，尊者羅睺羅聞佛所說，歡喜奉行。

(四六九) # 數取趣

[0119c07] 如是我聞：

[0119c07] 一時，佛住王舍城迦蘭陀竹園。

[0119c08] 爾時，世尊告諸比丘：「大海深嶮者，此世間愚夫所說深嶮，非賢聖

法、律所說深嶮。世間所說者，是大水積聚數耳，若從身生諸受，眾苦逼迫，或惱、或死，是名大海極深嶮處。

愚癡無聞凡夫於此身生諸受，苦痛逼迫，或惱、或死，憂悲稱怨，啼哭號呼，心亂發狂，長淪沒溺，無止息處。

多聞聖弟子於身生諸受，苦痛逼迫，或惱、或死，不生憂悲、啼哭號呼、心生狂亂，不淪生死，得止息處。」

[0119c17] 爾時，世尊即說偈言：

「身生諸苦受， 逼迫乃至死， 憂悲不息忍， 號呼發狂亂，
心自生障礙， 招集眾苦增， 永淪生死海， 莫知休息處。
能捨身諸受， 身所生苦惱， 切迫乃至死， 不起憂悲想。
不啼哭號呼， 能自忍眾苦， 心不生障礙， 招集眾苦增。
不淪沒生死， 永得安隱處。」

[0119c27] 佛說此經已，諸比丘聞佛所說，歡喜奉行。

(四七〇) #轉

[0119c28] 如是我聞：

[0119c28] 一時，佛住王舍城迦蘭陀竹園。

[0119c29] 爾時，世尊告諸比丘：「愚癡無聞凡夫生苦樂受、不苦不樂受，多聞聖弟子亦生苦樂受、不苦不樂受。諸比丘！凡夫、聖人有何差別？」

[0120a03] 諸比丘白佛：「世尊是法根、法眼、法依。善哉！世尊！唯願廣說，諸比丘聞已，當受奉行。」

[0120a05] 佛告諸比丘：「愚癡無聞凡夫身觸生諸受，苦痛逼迫，乃至奪命，憂愁啼哭，稱怨號呼。」

[0120a08] 佛告諸比丘：「諦聽，善思，當為汝說。諸比丘！愚癡無聞凡夫身觸生諸受，增諸苦痛，乃至奪命，愁憂稱怨，啼哭號呼，心生狂亂，當於爾時，增長二受，若身受、若心受。」

[0120a12] 「譬如士夫身被雙毒箭，極生苦痛，愚癡無聞凡夫亦復如是。增長二受，身受、心受，極生苦痛。所以者何？以彼愚癡無聞凡夫不了知故，於諸五欲生樂受觸，受五欲樂，受五欲樂故，為貪使所使；苦受觸故，則生瞋恚，生瞋恚故，為恚使所使。」

於此二受，若集、若滅、若味、若患、若離不如實知；不如實知故，生不苦不樂受，為癡使所使。

為樂受所繫終不離，苦受所繫終不離，不苦不樂受所繫終不離。云何繫？謂為貪、恚、癡所繫，為生、老、病、死、憂、悲、惱、苦所繫。

[0120a22] 「多聞聖弟子身觸生苦受，大苦逼迫，乃至奪命，不起憂悲稱怨、啼哭號呼、心亂發狂，當於爾時，唯生一受，所謂身受，不生心受。

[0120a25] 「譬如士夫被一毒箭，不被第二毒箭，當於爾時，唯生一受，所謂身受，不生心受。為樂受觸，不染欲樂，不染欲樂故，於彼樂受，貪使不使。於苦觸受不生瞋恚，不生瞋恚故，恚使不使。

於彼二使，集、滅、味、患、離如實知，如實知故，不苦不樂受癡使不使，於彼樂受解脫不繫，苦受、不苦不樂受解脫不繫。於何不繫？謂貪、恚、癡不繫，生、老、病、死、憂、悲、惱、苦不繫。」

[0120b05] 爾時，世尊即說偈言：

「多聞於苦樂， 非不受覺知， 彼於凡夫人， 其實大有聞。
樂受不放逸， 苦觸不增憂， 苦樂二俱捨， 不順亦不違。
比丘勤方便， 正智不傾動， 於此一切受， 點慧能了知。
了知諸受故， 現法盡諸漏， 身死不墮數， 永處般涅槃。」

[0120b14] 佛說此經已，諸比丘聞佛所說，歡喜奉行。

(四七一)

[0120b15] 如是我聞：

[0120b15] 一時，佛住王舍城迦蘭陀竹園。

[0120b16] 爾時，世尊告諸比丘：「譬如空中狂風卒起，從四方來，有塵土風、無塵土風、毘濕波風、鞞嵐婆風、薄風、厚風，乃至風輪起風。

身中受風亦復如是，種種受起——樂受、苦受、不苦不樂受，樂身受、苦身受、不苦不樂身受，樂心受、苦心受、不苦不樂心受，樂食受、苦食受、不苦不樂食受，樂無食、苦無食、不苦不樂無食受，樂貪受、苦貪受、不苦不樂貪受，樂出要受、苦出要受、不樂不苦出要受。」

[0120b24] 爾時，世尊即說偈言：

「譬如虛空中， 種種狂風起， 東西南北風， 四維亦如是。」

有塵及無塵， 乃至風輪起， 如是此身中， 諸受起亦然。
若樂若苦受， 及不苦不樂， 有食與無食， 貪著不貪著。
比丘勤方便， 正智不傾動， 於此一切受， 點慧能了知。
了知諸受故， 現法盡諸漏， 身死不墮數， 永處般涅槃。」

[0120c07] 佛說此經已，諸比丘聞佛所說，歡喜奉行。

(四七二)

[0120c08] 如是我聞：

[0120c08] 一時，佛住王舍城迦蘭陀竹園。

[0120c09] 爾時，世尊告諸比丘：「譬如客舍種種人住，若剎利、婆羅門、長者居士、野人獵師、持戒犯戒、在家出家，悉於中住。

此身亦復如是，種種受生——苦受、樂受、不苦不樂受，樂身受、苦身受、不苦不樂身受，樂心受、苦心受、不苦不樂心受，樂食受、苦食受、不苦不樂食受，樂無食受、苦無食受、不苦不樂無食受，樂貪著受、苦貪著受、不苦不樂貪著受，樂出要受、苦出要受、不苦不樂出要受。」

[0120c17] 爾時，世尊即說偈言：

「譬如客舍中， 種種人住止， 剎利婆羅門， 長者居士等，
旃陀羅野人， 持戒犯戒者， 在家出家人， 如是等種種，
此身亦如是。 種種諸受生， 若樂若苦受， 及不苦不樂，
有食與無食， 貪著不貪著， 比丘勤方便， 正智不傾動，
於此一切受， 點慧能了知， 了知諸受故， 現法盡諸漏，
身死不墮數， 永處般涅槃。」

[0121a01] 佛說此經已，諸比丘聞佛所說，歡喜奉行。

(四七三) # 道理

[0121a02] 如是我聞：

[0121a02] 一時，佛住王舍城迦蘭陀竹園。

[0121a03] 時，有異比丘獨一靜處禪思，念言：「世尊說三受——樂受、苦受、不苦不樂受，又說諸所有受悉皆是苦，此有何義？」是比丘作是念已，從禪起，往詣佛所，稽首禮足，退住一面，白佛言：「世尊！我於靜處禪思，念言：『世尊說三受——樂受、苦受、不苦不樂受，又說諸所有受悉皆是苦，此有何義？』」

[0121a09] 佛告比丘：「我以一切行無常故，一切諸行變易法故，說諸所有受悉皆是苦。」

[0121a11] 爾時，世尊即說偈言：

「知諸行無常， 皆是變易法， 故說受悉苦， 正覺之所知。
比丘勤方便， 正智不傾動， 於諸一切受， 點慧能了知。
悉知諸受已， 現法盡諸漏， 身死不墮數， 永處般涅槃。」

[0121a18] 佛說是經已，諸比丘聞佛所說，歡喜奉行。

(四七四) # 寂靜

[0121a19] 如是我聞：

[0121a19] 一時，佛住王舍城迦蘭陀竹園。

[0121a20] 爾時，尊者阿難獨一靜處禪思，念言：「世尊說三受——樂受、苦受、不苦不樂受，又復說諸所有受悉皆是苦，此有何義？」作是念已，從禪起，詣世尊所，稽首禮足，退住一面，白佛言：「世尊！我獨一靜處禪思，念言：『如世尊說三受——樂受、苦受、不苦不樂受，又說一切諸受悉皆是苦，此有何義？』」

[0121a26] 佛告阿難：「我以一切行無常故，一切行變易法故，說諸所有受悉皆是苦。又復，阿難！我以諸行漸次寂滅故說，以諸行漸次止息故說，一切諸受悉皆是苦。」

[0121b01] 阿難白佛言：「云何？世尊！以諸受漸次寂滅故說？」

[0121b02] 佛告阿難：「初禪正受時，言語寂滅，第二禪正受時，覺觀寂滅，第三禪正受時，喜心寂滅，第四禪正受時，出入息寂滅；空入處正受時，色想寂滅。識入處正受時，空入處想寂滅。無所有入處正受時，識入處想寂滅。非想非非想入處正受時，無所有入處想寂滅。想受滅正受時，想受寂滅，是名漸次諸行寂滅。」

[0121b09] 阿難白佛言：「世尊！云何漸次諸行止息？」

[0121b10] 佛告阿難：「初禪正受時，言語止息。二禪正受時，覺觀止息。三禪正受時，喜心止息。四禪正受時，出入息止息；空入處正受時，色想止息。識入處正受時，空入處想止息。無所有入處正受時，識入處想止息。非想非非想入處正受時，無所有入處想止息。想受滅正受時，想受止息，是名漸次諸行止息。」

[0121b17] 阿難白佛：「世尊！是名漸次諸行止息。」

[0121b17] 佛告阿難：「復有勝止息、奇特止息、上止息、無上止息。如是止息，於餘止息無過上者。」

[0121b19] 阿難白佛：「何等為勝止息、奇特止息、上止息、無上止息，諸餘止息無過上者？」

[0121b21] 佛告阿難：「於貪欲心不樂、解脫。恚、癡心不樂、解脫，是名勝止息、奇特止息、上止息、無上止息，諸餘止息無過上者。」

[0121b24] 佛說此經已，尊者阿難聞佛所說，歡喜奉行。

(四七五) # 觀察

[0121b26] 如是我聞：

[0121b26] 一時，佛住王舍城迦蘭陀竹園。

[0121b27] 爾時，世尊告諸比丘：「毘婆尸如來未成佛時，獨一靜處，禪思思惟，作如是觀，觀察諸受。云何為受？云何受集？云何受滅？云何受集道跡？云何受滅道跡？云何受味？云何受患？云何受離？」

如是觀察，有三受——樂受、苦受、不苦不樂受。觸集是受集，觸滅是受滅。若於受愛樂、讚歎、染著、堅住，是名受集道跡。若於受不愛樂、讚歎、染著、堅住，是名受滅道跡。若受因緣生樂喜，是名受味，若受無常變易法，是名受患。若於受斷欲貪、越欲貪，是名受離。」

[0121c08] 佛說此經已，諸比丘聞佛所說，歡喜奉行。

[0121c10] 如毘婆尸佛，如是式棄佛、毘濕波浮佛、迦羅迦孫提佛、迦那迦牟尼佛、迦葉佛，及我釋迦文佛，未成佛時思惟觀察諸受，亦復如是。

(四七六)

[0121c13] 如是我聞：

[0121c13] 一時，佛住王舍城迦蘭陀竹園。

[0121c14] 爾時，有異比丘獨一靜處禪思。如是觀察諸受。云何受？云何受集？云何受滅？云何受集道跡？云何受滅道跡？云何受味？云何受患？云何受離？」

[0121c17] 時，彼比丘從禪覺已，詣世尊所，稽首禮足，退住一面，白佛言：「世尊！我獨一靜處禪思，觀察諸受。云何為受？云何受集？云何受滅？云何受集道跡？云何受滅道跡？云何受味？云何受患？云何受離？」

[0121c21] 佛告比丘：「有三受——樂受、苦受、不苦不樂受。觸集是受集，觸滅是受滅。若於受愛樂、讚歎、染著、堅住，是名受集道跡。若於受不愛樂、讚歎、染著、堅住，是名受滅道跡。若受因緣生樂喜，是名受味，若受無常變易法，是名受患。若於受斷欲貪、越欲貪，是名受離。」

[0121c27] 佛說此經已，諸比丘聞佛所說，歡喜奉行。

（四七七）

[0121c29] 如異比丘問經，尊者阿難所問經亦如是。

（四七八）

[0122a02] 如是我聞：

[0122a02] 一時，佛住王舍城迦蘭陀竹園。

[0122a03] 爾時，世尊告諸比丘：「云何為受？云何受集？云何受滅？云何受集道跡？云何受滅道跡？」

[0122a05] 諸比丘白佛言：「世尊是法根、法眼、法依。善哉！世尊！唯願廣說，諸比丘聞已，當受奉行。」

[0122a07] 佛告諸比丘：「諦聽，善思，當為汝說。」佛告比丘：「有三受——樂受、苦受、不苦不樂受。觸集是受集、觸滅是受滅。若於受愛樂、讚歎、染著、堅住，是名受集道跡；若於受不愛樂、讚歎、染著、堅住，是名受滅道跡。若受因緣生樂喜，是名受味；若受無常變易，是名受患；若於受斷欲貪、越欲貪，是名受離。」

[0122a13] 佛說此經已，諸比丘聞佛所說，歡喜奉行。

（四七九）

[0122a15] 如是我聞：

[0122a15] 一時，佛住王舍城迦蘭陀竹園。

[0122a16] 爾時，世尊告諸比丘：「若我於諸受不如實知，受集、受滅、受集道跡、受滅道跡、受味、受患、受離不如實知，我於諸天世間、魔、梵、沙門、婆羅門、天、人眾中，不得解脫、出離、脫諸顛倒，亦非阿耨多羅三藐三菩提。

以我於諸受、受集、受滅、受集道跡、受滅道跡、受味、受患、受離如實知故，於諸天世間、魔、梵、沙門、婆羅門、天、人眾中，為脫、為出、為脫諸顛倒，得阿耨多羅三藐三菩提。」

[0122a24] 佛說此經已，諸比丘聞佛所說，歡喜奉行。

(四八〇) # 受生起

[0122a26] 如是我聞：

[0122a26] 一時，佛住王舍城迦蘭陀竹園。

[0122a27] 爾時，世尊告諸比丘：「若沙門、婆羅門於諸受不如實知，受集、受滅、受集道跡、受滅道跡、受味、受患、受離不如實知者；非沙門、非婆羅門，不同沙門、不同婆羅門，非沙門義、非婆羅門義，現法自知作證：『我生已盡，梵行已立，所作已作，自知不受後有。』」

[0122b04] 「若沙門、婆羅門於諸受如實知，受集、受滅、受集道跡、受滅道跡、受味、受患、受離如實知者，彼是沙門之沙門、婆羅門之婆羅門，同沙門、同婆羅門，沙門義、婆羅門義，現法自知作證：『我生已盡，梵行已立，所作已作，自知不受後有。』」

[0122b09] 佛說此經已，諸比丘聞佛所說，歡喜奉行。

[0122b11] 如沙門、非沙門，如是沙門數、非沙門數亦如是。

(四八一)

[0122b13] 如是我聞：

[0122b13] 一時，佛住壹奢能伽羅國壹奢能伽羅林中。

[0122b14] 爾時，世尊告諸比丘：「我欲於此中半月坐禪。諸比丘！勿復遊行，唯除乞食及布薩，即便坐禪，不復遊行，唯除乞食及布薩。」

[0122b17] 爾時，世尊半月過已，敷坐具，於眾前坐，告諸比丘：「我以初成佛時所思惟禪法少許禪分，於今半月，思惟作是念：『諸有眾生，生受皆有因緣，非無因緣。云何因緣？欲是因緣、覺是因緣、觸是因緣。』」

[0122b22] 「諸比丘！於欲不寂滅、覺不寂滅、觸不寂滅，彼因緣故，眾生生受，以不寂滅因緣故，眾生生受。彼欲寂滅、覺不寂滅、觸不寂滅，以彼因緣故，眾生生受，以不寂滅因緣故，眾生生受。彼欲寂滅、覺寂滅、觸不寂滅，以彼因緣故，眾生生受，以不寂滅因緣故，眾生生受。彼欲寂滅、覺寂滅、觸寂滅，以彼因緣故，眾生生受，以彼寂滅因緣故，眾生生受。邪見因緣故，眾生生受，邪見不寂滅因緣故，眾生生受。邪志、邪語、邪業、邪命、邪方便、邪念、邪定、邪解脫、邪智因緣故，眾生生受，邪智不寂滅因緣故，眾生生受。」

正見因緣故，眾生受，正見寂滅因緣故，眾生受。正志、正語、正業、正命、正方便、正念、正定、正解脫、正智因緣故，眾生受，正智寂滅因緣故，眾生受。若彼欲不得者得、不獲者獲、不證者證生，以彼因緣故，眾生受，以彼寂滅因緣故，眾生受。是名不寂滅因緣，眾生受。寂滅因緣，眾生受。

[0122c11] 「若沙門、婆羅門如是緣緣、緣緣集、緣緣滅、緣緣集道跡、緣緣滅道跡不如實知者，彼非沙門之沙門、非婆羅門之婆羅門，不同沙門之沙門、不同婆羅門之婆羅門，非沙門義、非婆羅門義，現法自知作證：『我生已盡，梵行已立，所作已作，自知不受後有。』」

[0122c17] 「若沙門、婆羅門於此緣緣、緣緣集、緣緣滅、緣緣集道跡、緣緣滅道跡如實知者，當知是沙門之沙門、婆羅門之婆羅門，同沙門、同婆羅門，以沙門義、婆羅門義，現法自知作證：『我生已盡，梵行已立，所作已作，自知不受後有。』」

[0122c22] 佛說此經已，諸比丘聞佛所說，歡喜奉行。

(四八二) # 劣等

[0122c24] 如是我聞：

[0122c24] 一時，佛住舍衛國祇樹給孤獨園。夏安居時。

[0122c25] 爾時，給孤獨長者來詣佛所，稽首禮足，却坐一面，佛為說法，示、教、照、喜，說種種法。示、教、照、喜已，從座起，整衣服，為佛作禮，合掌白佛言：「唯願世尊與諸大眾受我三月請衣被、飲食、應病湯藥。」

[0122c29] 爾時，世尊默然而許。

[0123a01] 時，給孤獨長者知佛默然受請已，從座起去，還歸自家，過三月已，來詣佛所，稽首禮足，退坐一面。佛告給孤獨長者：「善哉！長者！三月供養衣被、飲食、應病湯藥。汝以莊嚴淨治上道，於未來世當獲安樂果報，然汝今莫得默然樂受此法，汝當精勤，時時學遠離喜樂，具足身作證。」

[0123a07] 時，給孤獨長者聞佛所說，歡喜隨喜，從座起而去。

[0123a09] 爾時，尊者舍利弗於眾中坐，知給孤獨長者去已，白佛言：「奇哉！世尊！善為給孤獨長者說法，善勸勵給孤獨長者，言：『汝已三月具足供養如來大眾中，淨治上道，於未來世，當受樂報；汝莫默然樂著此福，汝當時時學遠離喜樂，具足身作證。』世尊！若使聖弟子學遠離喜樂，具足身作證，得遠離五法，修滿五法。」

云何遠離五法？謂斷欲所長養喜、斷欲所長養憂、斷欲所長養捨、斷不善所長養喜、斷不善所長養憂，是名五法遠離。

云何修滿五法？謂隨喜、歡喜、猗息、樂、一心。」

[0123a19] 佛告舍利弗：「如是，如是。若聖弟子修學遠離喜樂，具足身作證，遠離五法，修滿五法。」

[0123a21] 佛說此經已，諸比丘聞佛所說，歡喜奉行。

（四八三）# 見等為最勝

[0123a23] 如是我聞：

[0123a23] 一時，佛住舍衛國祇樹給孤獨園。

[0123a24] 爾時，世尊告諸比丘：「有食念者、有無食念者、有無食無食念者；有食樂者、無食樂者、有無食無食樂者；有食捨者、有無食捨者、有無食無食捨者；有食解脫者、有無食解脫者、有無食無食解脫者。」

[0123a28] 「云何食念？謂五欲因緣生念。

云何無食念？謂比丘離欲、離惡不善法，有覺有觀，離生喜樂，初禪具足住，是名無食念。

云何無食無食念？謂比丘有覺有觀息，內淨一心，無覺無觀，定生喜樂，第二禪具足住，是名無食無食念。

[0123b04] 「云何有食樂？謂五欲因緣生樂、生喜，是名有食樂。

云何無食樂？謂息有覺有觀，內淨一心，無覺無觀，定生喜樂，是名無食樂。

云何無食無食樂？謂比丘離喜貪，捨心住正念正知，安樂住彼聖說捨，是名無食無食樂。

[0123b09] 「云何有食捨？謂五欲因緣生捨，是名有食捨。

云何無食捨？謂彼比丘離喜貪，捨心住正念正知，安樂住彼聖說捨，第三禪具足住，是名無食捨。

云何無食無食捨？謂比丘離苦息樂，憂喜先已離，不苦不樂捨，淨念一心，第四禪具足住，是名無食無食捨。

[0123b15] 「云何有食解脫？謂色俱行。

云何無食解脫？謂無色俱行。

云何無食無食解脫？謂彼比丘貪欲不染、解脫，瞋恚、愚癡心不染、解脫，是名無食無食解脫。」

[0123b18] 佛說此經已，諸比丘聞佛所說，歡喜奉行。

(四八四)

[0123b20] 如是我聞：

[0123b20] 一時，佛住舍衛國祇樹給孤獨園。

[0123b21] 爾時，尊者跋陀羅比丘及尊者阿難俱住祇樹給孤獨園。

[0123b22] 爾時，尊者阿難往詣尊者跋陀羅所，共相問訊慰勞已，於一面住。時，尊者阿難問尊者跋陀羅比丘言：「云何名為見第一？云何聞第一？云何樂第一？云何想第一？云何有第一？」

[0123b26] 尊者跋陀羅語尊者阿難言：「有梵天自在造作、化如意，為世之父，若見彼梵天者，名曰見第一。」

[0123b28] 「阿難！有眾生離生喜樂，處處潤澤，處處敷悅，舉身充滿，無不滿處。所謂離生喜樂，彼從三昧起，舉聲唱說，遍告大眾：『極寂靜者，離生喜樂，極樂者，離生喜樂。』諸有聞彼聲者，是名聞第一。」

[0123c04] 「復次，阿難！有眾生於此身離喜之樂潤澤，處處潤澤，敷悅充滿，舉身充滿，無不滿處，所謂離喜之樂，是名樂第一。」

[0123c07] 「云何想第一？阿難！有眾生度一切識入處無所有，無所有入處具足住，若起彼想者，是名想第一。」

[0123c09] 「云何有第一？復次，阿難！有眾生度一切無所有入處，非想非非想入處具足住，若起彼有者，是名有第一。」

[0123c12] 尊者阿難語尊者跋陀羅比丘言：「多有人作如是見、如是說，汝亦同彼，有何差別？我作方便問汝，汝當諦聽，當為汝說。如其所觀，次第盡諸漏，是為見第一。」

如其所問，次第盡諸漏，是名聞第一。

如所生樂，次第盡諸漏者，是名樂第一。

如其所想，次第盡諸漏者，是名想第一。

如實觀察，次第盡諸漏，是名有第一。」

[0123c19] 時，二正士共論說已，從座起去。

(四八五) # 諸受相差別

[0123c21] 如是我聞：

[0123c21] 一時，佛住王舍城迦蘭陀竹園。

[0123c22] 爾時，瓶沙王詣尊者優陀夷所，稽首作禮，退坐一面。時，瓶沙王白尊者優陀夷言：「云何世尊所說諸受？」

[0123c24] 優陀夷言：「大王！世尊說三受——樂受、苦受、不苦不樂受。」

[0123c25] 瓶沙王白尊者優陀夷：「莫作是言：『世尊說三受——樂受、苦受、不苦不樂受。』正應有二受——樂受、苦受。若不苦不樂受，是則寂滅。」如是三說，優陀夷不能為王立三受，王亦不能立二受，俱^[1]共詣佛所，稽首禮足，退住一面。

[0124a02] 時，尊者優陀夷以先所說，廣白世尊：「我亦不能立三受，王亦不能立二受，今故共來具問世尊如是之義，定有幾受？」

[0124a04] 佛告優陀夷：「我有時說一受，或時說二受，或說三、四、五、六、十八、三十六，乃至百八受，或時說無量受。

[0124a07] 「云何我說一受？如說所有受，皆悉是苦，是名我說一受。云何說二受？說身受、心受，是名二受。云何三受？樂受、苦受、不苦不樂受。云何四受？謂欲界繫受、色界繫受、無色界繫受，及不繫受。云何說五受？謂樂根、喜根、苦根、憂根、捨根，是名說五受。云何說六受？謂眼觸生受。耳、鼻、舌、身、意觸生受。

云何說十八受？謂隨六喜行、隨六憂行、隨六捨行受，是名說十八受。

云何三十六受，依六貪著喜、依六離貪著喜、依六貪著憂、依六離貪著憂、依六貪著捨、依六離貪著捨，是名說三十六受。

云何說百八受？謂三十六受，過去三十六、未來三十六、現在三十六，是名說百八受。

云何說無量受？如說此受彼受等，比如是無量名說，是名說無量受。

[0124a22] 「優陀夷！我如是種種說受如實義，世間不解，故而共諍論，共相違反，終竟不得我法、律中真實之義以自止息。優陀夷！若於我此所說種種受義，如實解知者，不起諍論、共相違反，起、未起諍能以法、律止令休息。

[0124a27] 「然，優陀夷！有二受，欲受、離欲受。

云何欲受，五欲功德因緣生受，是名欲受。

云何離欲受？謂比丘離欲、惡不善法，有覺有觀，離生喜樂，初禪具足住，是名離欲受。

[0124b02] 「若有說言眾生依此初禪，唯是為樂非餘者，此則不然。所以者何？更有勝樂過於此故，何者是？謂比丘離有覺有觀，內淨，定生喜、樂，第二禪具足住，是名勝樂。如是，乃至非想非非想入處，轉轉勝說。

[0124b07] 「若有說言：『唯有此處，乃至非想非非想極樂非餘。』亦復不然。所以者何？更有勝樂過於此故，何者是？謂比丘度一切非想非非想入處，想受滅，身作證具足住，是名勝樂過於彼者。

[0124b11] 「若有異學出家作是說言：『沙門釋種子唯說想受滅，名為至樂。』此所不應。所以者何？應當語言：『此非世尊所說受樂數，世尊說受樂數者，如說。』

[0124b14] 「優陀夷！有四種樂。何等為四？謂離欲樂、遠離樂、寂滅樂、菩提樂。」

[0124b16] 佛說此經已，尊者優陀夷及瓶沙王聞佛所說，歡喜奉行。

（四八六）# 知差別

[0124b18] 如是我聞：

[0124b18] 一時，佛住王舍城迦蘭陀竹園。

[0124b19] 爾時，世尊告諸比丘：「若於一法，生正厭離、不樂、背捨，得盡諸漏，所謂一切眾生由食而存。復有二法，名及色。復有三法，謂三受。復有四法，謂四食。復有五法，謂五受陰。復有六法，謂六內外入處。復有七法，謂七識住。復有八法，謂世八法。復有九法，謂九眾生居。復有十法，謂十業跡。於此十法，生厭、不樂、背捨，得盡諸漏。」

[0124b26] 佛說此經已，諸比丘聞佛所說，歡喜奉行。

（四八七）

[0124b28] 如是我聞：

[0124b28] 一時，佛住王舍城迦蘭陀竹園。

[0124b29] 爾時，世尊告諸比丘：「若於一法，生正厭離、不樂、背捨，究竟苦邊，解脫於苦，謂一切眾生由食而存。復有二法，名及色。復有三法，謂三受。復有四法，謂四食。復有五法，謂五受陰。復有六法，謂六內外入處。復有七法，謂七識住。復有八法，謂世八法。復有九法，謂九眾生居。復有十法，謂十業跡。於此十法，生正厭離、不樂、背捨，究竟苦邊，解脫於苦。」

[0124c08] 佛說此經已，諸比丘聞佛所說，歡喜奉行。

(四八八)

[0124c10] 如是我聞：

[0124c10] 一時，佛住王舍城迦蘭陀竹園。

[0124c11] 爾時，世尊告諸比丘：「若於一法，觀察無常、觀察變易、觀察離欲、觀察滅、觀察捨離，得盡諸漏，謂一切眾生由食而存。復有二法，名及色。復有三法，謂三受。復有四法，謂四食。復有五法，謂五受陰。復有六法，謂六內外入處。復有七法，謂七識住。復有八法，謂世八法。復有九法，謂九眾生居。復有十法，謂十業跡。於此十法，正觀無常、觀察變易、觀察離欲、觀察滅、觀察捨離，得盡諸漏。」

[0124c20] 佛說此經已，諸比丘聞佛所說，歡喜奉行。

(四八九)

[0124c22] 如是我聞：

[0124c22] 一時，佛住王舍城迦蘭陀竹園。

[0124c23] 爾時，世尊告諸比丘：「若於一法，觀察無常、觀察變易、觀察離欲、觀察滅、觀察捨離，究竟苦邊，解脫於苦，謂一切眾生由食存。復有二法，名及色。復有三法，謂三受。復有四法，謂四食。復有五法，謂五受陰。復有六法，謂六內外入處。復有七法，謂七識住。復有八法，謂世八法。復有九法，謂九眾生居。復有十法，謂十業跡。於此十業跡，觀察無常、觀察變易、觀察離欲、觀察滅、觀察捨離，究竟苦邊，解脫於苦。」

[0125a03] 佛說此經已，諸比丘聞佛所說，歡喜奉行。

等覺真義差別《辯中邊論卷上》·〈辯障品第二〉

煩惱障相略有九種。謂愛等九種結。愛結障厭，由此於順境不能厭離故。

恚結障捨，由此於違境不能棄捨故。

餘七結障真見。於七遍知，如次障故。

謂慢結能障偽身見遍知。修現觀時有間無間我慢現起，由此勢力彼不斷故。

無明結能障身見事遍知。由此不知諸取蘊故。

見結能障滅諦遍知。由薩迦耶及邊執見怖畏滅故。由邪見謗滅故。

取結能障道諦遍知。取餘法為淨故。

疑結能障三寶遍知。由此不信受三寶功德故。

嫉結能障利養恭敬等遍知。由此不見彼過失故。

慳結能障遠離遍知。由此貪著資生具故。

[0778b17] 聞如是。

[0778b17] 一時。佛在羅閱城迦蘭陀竹園所。與大比丘眾五百人俱。

[0778b18] 是時。眾多比丘時到。著衣持鉢。入羅閱城乞食。是時。眾多比丘便作是念。我等入城乞食。日猶故早。我等可至外道異學。與共論議。是時。眾多比丘便至外道異學所。時。諸外道遙見諸沙門來。各各自謂言。各各寂寞。勿有高聲語言。沙門瞿曇弟子今來此間。然沙門之法。稱譽寂寞之人。令知我等正法。不亂有亂。

[0778b26] 爾時。眾多比丘便至外道異學所。共相問訊。在一面坐。

[0778b27] 爾時。外道問諸比丘。汝等。沙門瞿曇與諸弟子說此妙法。是諸比丘盡解一切諸法，而自遊戲不干。我等亦復與諸弟子說此妙法而自遊戲。我之所說。與汝有何等異。有何差別？說法戒。教一類無異。是時。眾多比丘聞外道異學所說。亦不稱善。復非言惡。即從坐起。各退而去。

[0778c04] 是時。眾多比丘自相謂言。我等當持此義。往白世尊。若如來有所說者。我當念奉行。

[0778c06] 爾時。眾多比丘入羅閱城乞食已。還至房中。收攝衣鉢。往至世尊所。頭面禮足。住在一面。爾時。眾多比丘以此緣本。盡向如來說之。爾時。世尊告諸比丘。彼外道異學問此義已。汝等應持此語報之。一論。一義。一演。乃至十論。十義。十演。說此語時有何等義。設汝持此語往問者。彼人則不能報之。彼外道異學遂增愚惑。所以然者？非彼所有境界。

[0778c15] 是故。比丘。我不見天及人民。魔。若魔天。釋。梵天王能報此語者。除如來及如來弟子從吾聞者。此則不論。一論。一義。一演。我雖說此義。由何故而說乎。一切眾生由食而存。無食則死。彼比丘平等厭患。平等解脫。平等觀察。平等分別其義。平等盡苦際。同一義而不二。我所說者。正謂此耳。

[0778c22] [23]一義。一論。一演。乃至十論。十義。十演。我雖說此義。由何說乎？名與色。彼何等謂名？所謂痛。想。念。更。思惟。是謂名也。彼云何名為色耶？四大及四大所造色。是謂名為色。以此緣本。故名為色也。二論。二義。二演者。由此因緣故。我今說之。

若比丘平等厭患。平等解脫。平等觀察。平等分別其義。平等盡其苦際。

[0778c29] 三論·三義·三演。由何等故而說此義乎？所謂三痛。云何為三？所謂苦痛·樂痛·不苦不樂痛。彼云何名為樂痛？所謂心中樂想。亦不散。是謂名為樂痛。彼云何名為苦痛？所謂心中憤亂而不定一。思惟若干想。是謂名為苦痛。彼云何名為不苦不樂痛？所謂心中無苦無樂想。復非一定。復非亂想。亦不思惟法與非法。恒自寂默。心無有記。是故名為不苦不樂痛。是謂三痛。若比丘平等厭患。平等解脫。平等觀察。平等分別其義。平等盡其苦際。我所說三論·三義·三演者。正謂此耳。

[0779a11] 四義·四論·四演。由何等故復說此義乎。所謂四諦。云何為四。所謂苦·習·盡·道聖諦。彼云何為苦諦。所謂生苦·老苦·病苦·死苦·憂悲惱苦·怨憎會苦·恩愛別苦·所欲不得苦。彼云何名為習諦。所謂愛本與欲相應者。是謂名為習諦。彼云何名為苦盡諦。所謂彼愛永盡無餘。更不復生。是謂名為苦盡諦。彼云何名為苦要諦。所謂賢聖八品道。正見·正治·正語·正命·正業·正方便·正念·正三昧。是名為八品之道也。若比丘平等厭患。平等解脫。平等分別其義。平等觀察。平等盡其苦際。是謂四論·四義·四演。我所說者。正謂此耳。

[0779a23] 五論·五義·五演。我今所說由何等故說。所謂五根。云何為五。信根·精進根·念根·定根·慧根。云何名為信根？所謂賢聖弟子。信如來道法。彼如來·至真·等正覺·明行成為·善逝·世間解·無上士·道法御·天人師。號佛·眾祐。出現於世。是謂名為信根。彼云何名為精進根？所謂身心意并勤勞不倦。滅不善法。使善增益。順心執持。是謂名為精進根。彼云何名為念根？所謂念根者。所誦不忘。恒在心懷。總持不失。有為·無漏之法。終不忘失。是謂名為念根。彼云何名為定根？所謂定根者。心中無錯亂。無若干想。恒專精一意。是謂名為三昧根。彼云何名為智慧根？所謂知苦·知習·知盡·知道。是謂名為智慧之根。此名五根也。比丘於中平等解脫。平等分別其義。平等盡其苦際。五論·五義·五演。我所說者。正謂此耳。

[0779b10] 六論·六義·六演。我所說者由何等故乎。所謂六重之法也。云何為六。於是。比丘恒身行慈心。若在閑淨室中。常若一心。可尊可貴。恒與和合。是謂比丘第一重法。復次。口行慈心。終無虛妄。可敬可貴。是謂第二重法。復次。意行慈。不起憎嫉。可敬可貴。是謂第三重法。復次。若得法利之養。鉢中遺餘。與諸梵行之人等心施與。是謂第四重法可敬可貴。復次。奉持禁戒。無所脫失。賢人之所貴。是謂第五重法可敬可貴。復次。正見賢聖得出要。得盡苦際。意不錯亂。與諸梵行之人等修其行。是謂第六之法可敬可貴。

爾時。比丘平等厭患。平等解脫。平等分別其義。平等盡於苦際。六論·六義·六演。我所說者。正謂此耳。

[0779b25] 七論·七義·七演。由何等故而說此乎。所謂七神識止處。云何為七。或有眾生。若干想。若干種身。所謂天及人也。或有眾生。若干種身一想。所謂梵迦夷天最初出時。或有眾生。一想一身。所謂光音天是也。或有眾生。一身若干想。所謂遍淨天是也。或有眾生。空處無量。所謂空處天是也。或有眾生。識處無量。所謂識處天是也。或有眾生。無所有處無量。所謂不用處天是也。或有眾生。有想無想處無量。所謂有想無想天是也。是謂。比丘。七神止處。於是。比丘平等解脫。乃至平等盡於苦際。七論·七義·七演。我所說者。正謂此耳。

[0779c08] 八論·八義·八演。我所說者由何等故而說此乎。所謂世間八法是隨世迴轉。云何為八？利·衰·毀·譽·稱·譏·苦·樂。是謂世間八法隨世迴轉。若比丘於中平等解脫。乃至盡於苦際。八論·八義·八演。我所說者。正謂此耳。

[0779c13] 九論·九義·九演。我所說者由何故而說此乎。所謂九眾生居處。云何為九？若有眾生。若干種身。所謂天及人。或有眾生。若干種身一想。謂梵迦夷天最初出時是也。或有眾生。一想一身。所謂光音天是也。或有眾生。一身若干想。所謂遍淨天也。或有眾生。空處無量。所謂空處天是也。或有眾生。識處無量。所謂識天也。或有眾生無有處無量。所謂不用處天是也。或有眾生。有想無想處無量。所謂有想無想天是也。無想眾生及諸所生之類。為九神止處。於是。比丘平等解脫。乃至盡於苦際。九論·九義·九演。我所說者。正謂此耳。

[0779c25] 十論·十義·十演。由何等說乎？所謂十念。念佛·念法·念比丘僧·念戒·念施·念天·念休息·念安般·念身·念死。是謂十念。若比丘平等解脫。乃至盡於苦際。十論·十義·十演。如是。比丘。從一至十。

[0780a01] 比丘當知。若外道異學聞此語者。猶不能熟視顏色。況欲報之。其有比丘解此義者。於現法中最尊第一之人。

若復比丘·比丘尼思惟此義。乃至十歲。必成二果。若阿羅漢·若阿那含。比丘且捨十歲。若一年之中思惟此義者。必成二果。終無中退。

比丘且捨一年。其四部之眾十月。若至一月思惟此義者。必成二果。亦不中退。

且捨一月。若四部之眾七日之中思惟此義。必成二果。終不有疑。

[0780a10] 爾時。阿難在世尊後。執扇扇佛。爾時。阿難白佛言。世尊。此法

極為甚深。若所在方面有此法者。當知便遇如來。唯然。世尊。此法名何等。當云何奉行。

[0780a13] 佛告阿難。此經名為十法之義。當念奉行。

[0780a14] 爾時。阿難及諸比丘聞佛所說。歡喜奉行。

問《中阿含經卷第二十一》〈中阿含長壽王品說處經第十五〉

[0562a21] 我聞如是。

[0562a21] 一時。佛遊舍衛國。在勝林給孤獨園。

[0562a22] 爾時。尊者阿難則於晡時從宴坐起。將諸年少比丘往詣佛所。稽首佛足。却住一面。諸年少比丘亦稽首佛足。却坐一面。尊者阿難白曰。世尊。此諸年少比丘我當云何教呵。云何訓誨。云何為彼而說法耶。

[0562a27] 世尊告曰。阿難。汝當為諸年少比丘說處及教處。若為諸年少比丘說處及教處者。彼便得安隱。得力得樂。身心不煩熱。終身行梵行。

[0562b01] 尊者阿難叉手向佛。白曰。世尊。今正是時。善逝。今正是時。若世尊為諸年少比丘說處及教處者。我與諸年少比丘從世尊聞已。當善受持。

[0562b04] 世尊告曰。阿難。汝等諦聽。善思念之。我當為汝及諸年少比丘廣分別說。尊者阿難等受教而聽。

[0562b07] 世尊告曰。阿難。我本為汝說五盛陰。色盛陰。覺·想·行·識盛陰。阿難。此五盛陰。汝當為諸年少比丘說以教彼。若為諸年少比丘說教此五盛陰者。彼便得安隱。得力得樂。身心不煩熱。終身行梵行。阿難。我本為汝說[8]六內處。眼處。耳·鼻·舌·身·意處。阿難。此六內處。汝當為諸年少比丘說以教彼。若為諸年少比丘說教此六內處者。彼便得安隱。得力得樂。身心不煩熱。終身行梵行。阿難。我本為汝說[9]六外處。色處。聲·香·味·觸·法處。阿難。此六外處。汝當為諸年少比丘說以教彼。若為諸年少比丘說教此六外處者。彼便得安隱。得力得樂。身心不煩熱。終身行梵行。

[0562b20] 阿難。我本為汝說六識身。眼識。耳·鼻·舌·身·意識。阿難。此六識身。汝當為諸年少比丘說以教彼。若為諸年少比丘說教此六識身者。彼便得安隱。得力得樂。身心不煩熱。終身行梵行。阿難。我本為汝說六更樂身。眼更樂。耳·鼻·舌·身·意更樂。阿難。此六更樂身。汝當為諸年少比丘說以教彼。若為諸年少比丘說教此六更樂身者。彼便得安隱。得力得樂。身

心不煩熱。終身行梵行。阿難。我本為汝說六覺身。眼覺。耳·鼻·舌·身·意覺。阿難。此六覺身。汝當為諸年少比丘說以教彼。若為諸年少比丘說教此六覺身者。彼便得安隱。得力得樂。身心不煩熱。終身行梵行。

[0562c04] 阿難。我本為汝說六想身。眼想。耳·鼻·舌·身·意想。阿難。此六想身。汝當為諸年少比丘說以教彼。若為諸年少比丘說教此六想身者。彼便得安隱。得力得樂。身心不煩熱。終身行梵行。阿難。我本為汝說六思身。眼思。耳·鼻·舌·身·意思。阿難。此六思身。汝當為諸年少比丘說以教彼。若為諸年少比丘說教此六思身者。彼便得安隱。得力得樂。身心不煩熱。終身行梵行。阿難。我本為汝說六愛身。眼愛。耳·鼻·舌·身·意愛。阿難。此六愛身。汝當為諸年少比丘說以教彼。若為諸年少比丘說教此六愛身者。彼便得安隱。得力得樂。身心不煩熱。終身行梵行。

[0562c17] 阿難。我本為汝說六界。地界。水·火·風·空·識界。阿難。此六界。汝當為諸年少比丘說以教彼。若為諸年少比丘說教此六界者。彼便得安隱。得力得樂。身心不煩熱。終身行梵行。

[0562c22] 阿難。我本為汝說因緣起及因緣起所生法。若有此則有彼。若無此則無彼。若生此則生彼。若滅此則滅彼。緣無明行。緣行識。緣識名色。緣名色六處。緣六處更樂。緣更樂覺。緣覺愛。緣愛受。緣受有。緣有生。緣生老死。若無明滅則行滅。行滅則識滅。識滅則名色滅。名色滅則六處滅。六處滅則更樂滅。更樂滅則覺滅。覺滅則愛滅。愛滅則受滅。受滅則有滅。有滅則生滅。生滅則老死滅。阿難。此因緣起及因緣起所生法。汝當為諸年少比丘說以教彼。若為諸年少比丘說教此因緣起及因緣起所生法者。彼便得安隱。得力得樂。身心不煩熱。終身行梵行。

[0563a06] 阿難。我本為汝說四念處。觀身如身。觀覺·心·法如法。阿難。此四念處。汝當為諸年少比丘說以教彼。若為諸年少比丘說教此四念處者。彼便得安隱。得力得樂。身心不煩熱。終身行梵行。阿難。我本為汝說四正斷。比丘者。已生惡不善法為斷故。起欲求方便行。精勤舉心斷。未生惡不善法為不生故。起欲求方便行。精勤舉心斷。未生善法為生故。起欲求方便行。精勤舉心斷。已生善法為住故·不忘故·不退故·轉增多故·廣布故·滿具足故。起欲求方便行。精勤舉心斷。阿難。此四正斷。汝當為諸年少比丘說以教彼。若為諸年少比丘說教此四正斷者。彼便得安隱。得力得樂。身心不煩熱。終身行梵行。

[0563a20] 阿難。我本為汝說四如意足。比丘者。成就欲定燒諸行。修習如意足。依於無欲·依離·依滅。願至非品。如是精進定·心定。成就觀定燒諸

行。修習如意足。依於無欲·依離·依滅。願至非品。阿難。此四如意足。汝當為諸年少比丘說以教彼。若為諸年少比丘說教此四如意足者。彼便得安隱。得力得樂。身心不煩熱。終身行梵行。阿難。我本為汝說四禪。比丘者。離欲·離惡不善之法。至得第四禪成就遊。阿難。此四禪。汝當為諸年少比丘說以教彼。若為諸年少比丘說教此四禪者。彼便得安隱。得力得樂。身心不煩熱。終身行梵行。

[0563b03] 阿難。我本為汝說四聖諦。苦聖諦。苦習·苦滅·苦滅道聖諦。阿難。此四聖諦。汝當為諸年少比丘說以教彼。若為諸年少比丘說教此四聖諦者。彼便得安隱。得力得樂。身心不煩熱。終身行梵行。阿難。我本為汝說四想。比丘者。有小想·有大想·有無量想·有無所有想。阿難。此四想。汝當為諸年少比丘說以教彼。若為諸年少比丘說教此四想者。彼便得安隱。得力得樂。身心不煩熱。終身行梵行。阿難。我本為汝說四無量。比丘者。心與慈俱。遍滿一方成就遊。如是二三四方。四維上下。普周一切。心與慈俱。無結·無怨·無恚·無諍。極廣甚大。無量善修。遍滿一切世間成就遊。如是悲·喜心與捨俱。無結·無怨·無恚·無諍。極廣甚大。無量善修。遍滿一切世間成就遊。阿難。此四無量。汝當為諸年少比丘說以教彼。若為諸年少比丘說教此四無量者。彼便得安隱。得力得樂。身心不煩熱。終身行梵行。

[0563b22] 阿難。我本為汝說四無色。比丘者。斷一切色想。乃至得非有想非無想處成就遊。阿難。此四無色。汝當為諸年少比丘說以教彼。若為諸年少比丘說教此四無色者。彼便得安隱。得力得樂。身心不煩熱。終身行梵行。阿難。我本為汝說四聖種。比丘·比丘尼者。得鹿素衣而知止足。非為衣故求滿其意。若未得衣。不憂悒。不啼泣。不搥胸。不癡惑。若得衣者。不染不著。不欲不貪。不觸不計。見災患知出要而用衣。如此事利不懈怠而正知者。是謂比丘·比丘尼正住舊聖種。如是食·住處。欲斷樂斷。欲修樂修。彼因欲斷樂斷·欲修樂修故。不自貴·不賤他。如此事利不懈怠而正知者。是謂比丘·比丘尼正住舊聖種。阿難。此四聖種。汝當為諸年少比丘說以教彼。若為諸年少比丘說教此四聖種者。彼便得安隱。得力得樂。身心不煩熱。終身行梵行。

[0563c11] 阿難。我本為汝說四沙門果。須陀洹·斯陀含·阿那含·最上阿羅漢果。阿難。此四沙門果。汝當為諸年少比丘說以教彼。若為諸年少比丘說教此四沙門果者。彼便得安隱。得力得樂。身心不煩熱。終身行梵行。阿難。我本為汝說五熟解脫想。無常想·無常苦想·苦無我想·不淨惡露想·一切世間不可樂想。阿難。此五熟解脫想。汝當為諸年少比丘說以教彼。若為諸年少比丘說教此五熟解脫想者。彼便得安隱。得力得樂。身心不煩熱。終身行梵行。

[0563c22] 阿難。我本為汝說五解脫處。若比丘·比丘尼因此故。未解脫心得解

脫。未盡諸漏得盡無餘。未得無上涅槃得無上涅槃。云何為五。阿難。世尊為比丘·比丘尼說法。諸智梵行者亦為比丘·比丘尼說法。阿難。若世尊為比丘·比丘尼說法。諸智梵行者亦為比丘·比丘尼說法。彼聞法已。便知法解義。彼因知法解義故。便得歡悅。因歡悅故。便得歡喜。因歡喜故。便得止身。因止身故。便得覺樂。因覺樂故。便得心定。阿難。比丘·比丘尼因心定故。便得見如實·知如真。因見如實·知如真故。便得厭。因厭故。便得無欲。因無欲故。便得解脫。因解脫故。便得知解脫。生已盡。梵行已立。所作已辦。不更受有。知如真。阿難。是謂第一解脫處。因此故。比丘·比丘尼未解脫心得解脫。未盡諸漏得盡無餘。未得無上涅槃得無上涅槃。

[0564a10] 復次。阿難。世尊不為比丘·比丘尼說法。諸智梵行者亦不為比丘·比丘尼說法。但如本所聞·所誦習法而廣讀之。若不廣讀本所聞·所誦習法者。但隨本所聞·所誦習法為他廣說。若不為他廣說本所聞·所誦習法者。但隨本所聞·所誦習法心思惟分別。若心不思惟分別本所聞·所誦習法者。但善受持諸三昧相。阿難。若比丘·比丘尼善受持諸三昧相者。便知法解義。彼因知法解義故。便得歡悅。因歡悅故。便得歡喜。因歡喜故。便得止身。因止身故。便得覺樂。因覺樂故。便得心定。

[0564a21] 阿難。比丘·比丘尼因心定故。便得見如實·知如真。因見如實·知如真故。便得厭。因厭故。便得無欲。因無欲故。便得解脫。因解脫故。便得知解脫。生已盡。梵行已立。所作已辦。不更受有。知如真。阿難。是謂第五解脫處。因此故。比丘·比丘尼未解脫心得解脫。未盡諸漏得盡無餘。未得無上涅槃得無上涅槃。阿難。此五解脫處。汝當為諸年少比丘說以教彼。若為諸年少比丘說教此五解脫處者。彼便得安隱。得力得樂。身心不煩熱。終身行梵行。

[0564b03] 阿難。我本為汝說五根。信根。精進·念·定·慧根。阿難。此五根。汝當為諸年少比丘說以教彼。若為諸年少比丘說教此五根者。彼便得安隱。得力得樂。身心不煩熱。終身行梵行。阿難。我本為汝說五力。信力。精進·念·定·慧力。阿難。此五力。汝當為諸年少比丘說以教彼。若為諸年少比丘說教此五力者。彼便得安隱。得力得樂。身心不煩熱。終身行梵行。

[0564b11] 阿難。我本為汝說五出要界。云何為五。阿難。多聞聖弟子極重善觀欲。彼因極重善觀欲故。心便不向欲。不樂欲。不近欲。不信解欲。若欲心生。即時融消焦縮。轉還不得舒張。捨離不住欲。穢惡厭患欲。阿難。猶如雞毛及筋。持著火中。即時融消·焦縮·轉還·不得舒張。阿難。多聞聖弟子亦復如是極重善觀欲。彼因極重善觀欲故。心便不向欲。不樂欲。不近欲。不信解欲。若欲心生。即時融消焦縮。轉還不得舒張。捨離不住欲。穢惡厭患欲。

觀無欲。心向無欲。樂無欲。近無欲。信解無欲。心無礙。心無濁。心得樂。能致樂。遠離一切欲及因欲生諸漏煩熱憂惑。解彼脫彼。復解脫彼。彼不復受此覺。謂覺因欲生。如是欲出要。阿難。是謂第一出要界。

[0564b27] 復次。阿難。多聞聖弟子極重善觀恚。彼因極重善觀恚故。心便不向恚。不樂恚。不近恚。不信解恚。若恚心生。即時融消焦縮。轉還不得舒張。捨離不住恚。穢惡厭患恚。阿難。猶如雞毛及筋。持著火中。即時融消焦縮。轉還不得舒張。阿難。多聞聖弟子亦復如是極重善觀恚。彼因極重善觀恚故。心便不向恚。不樂恚。不近恚。不信解恚。若恚心生。即時融消焦縮。轉還不得舒張。捨離不住恚。穢惡厭患恚。觀無恚。心向無恚。樂無恚。近無恚。信解無恚。心無礙。心無濁。心得樂。能致樂。遠離一切恚。及因恚生諸漏煩熱憂惑。解彼脫彼。復解脫彼。彼不復受此覺。謂覺因恚生。如是恚出要。阿難。是謂第二出要界。

[0564c12] 復次。阿難。多聞聖弟子極重善觀害。彼因極重善觀害故。心便不向害。不樂害。不近害。不信解害。若害心生。即時融消焦縮。轉還不得舒張。捨離不住害。穢惡厭患害。阿難。猶如雞毛及筋。持著火中。即時融消焦縮。轉還不得舒張。阿難。多聞聖弟子亦復如是極重善觀害。彼因極重善觀害故。心便不向害。不樂害。不近害。不信解害。若害心生。即時融消焦縮。轉還不得舒張。捨離不住害。穢惡厭患害。觀無害。心向無害。樂無害。近無害。信解無害。心無礙。心無濁。心得樂。能致樂。遠離一切害及因害生諸漏煩熱憂惑。解彼脫彼。復解脫彼。彼不復受此覺。謂覺因害生。如是害出要。阿難。是謂第三出要界。

[0564c26] 復次。阿難。多聞聖弟子極重善觀色。彼因極重善觀色故。心便不向色。不樂色。不近色。不信解色。若色心生。即時融消焦縮。轉還不得舒張。捨離不住色。穢惡厭患色。阿難。猶如雞毛及筋。持著火中。即時融消焦縮。轉還不得舒張。阿難。多聞聖弟子亦復如是極重善觀色。彼因極重善觀色故。心便不向色。不樂色。不近色。不信解色。若色心生。即時融消焦縮。轉還不得舒張。捨離不住色。穢惡厭患色。觀無色。心向無色。樂無色。近無色。信解無色。心無礙。心無濁。心得樂。能致樂。遠離一切色及因色生諸漏煩熱憂惑。解彼脫彼。復解脫彼。彼不復受此覺。謂覺因色生。如是色出要。阿難。是謂第四出要界。

[0565a12] 復次。阿難。多聞聖弟子極重善觀己身。彼因極重善觀己身故。心便不向己身。不樂己身。不近己身。不信解己身。若己身心生。即時融消焦縮。轉還不得舒張。捨離不住己身。穢惡厭患己身。阿難。猶如雞毛及筋。持著火中。即時融消焦縮。轉還不得舒張。阿難。多聞聖弟子亦復如是極重善觀

己身。彼因極重善觀己身故。心便不向己身。不樂己身。不近己身。不信解己身。若己身心生。即時融消焦縮。轉還不得舒張。捨離不住己身。穢惡厭[1]患己身。觀無己身。心向無己身。樂無己身。近無己身。信解無己身。心無礙。心無濁。心得樂。能致樂。遠離一切己身及因己身生諸漏煩熱憂感。解彼脫彼。復解脫彼。彼不復受此覺。調覺因己身生。如是己身出要。阿難。是謂第五出要界。

[0565a28] 阿難。此五出要界。汝當為諸年少比丘說以教彼。若為諸年少比丘說教此五出要界者。彼便得安隱。得力得樂。身心不煩熱。終身行梵行。

[0565b02] 阿難。我本為汝說七財。信財。戒。慚。愧。聞。施。慧財。阿難。此七財。汝當為諸年少比丘說以教彼。若為諸年少比丘說教此七財者。彼便得安隱。得力得樂。身心不煩熱。終身行梵行。阿難。我本為汝說七力。信力。精進。慚。愧。念。定。慧力。阿難。此七力。汝當為諸年少比丘說以教彼。若為諸年少比丘說教此七力者。彼便得安隱。得力得樂。身心不煩熱。終身行梵行。

[0565b11] 阿難。我本為汝說七覺支。念覺支。擇法。精進。喜。息。定。捨覺支。阿難。此七覺支。汝當為諸年少比丘說以教彼。若為諸年少比丘說教此七覺支者。彼便得安隱。得力得樂。身心不煩熱。終身行梵行。

[0565b15] 阿難。我本為汝說八支聖道。正見。正志。正語。正業。正命。正方便。正念。正定。是謂為八。阿難。此八支聖道。汝當為諸年少比丘說以教彼。若為諸年少比丘說教此八支聖道者。彼便得安隱。得力得樂。身心不煩熱。終身行梵行。

[0565b21] 於是。尊者阿難叉手向佛。白曰。世尊。甚奇。甚特。世尊為諸年少比丘說處及教處。

[0565b23] 世尊告曰。阿難。如是。如是。甚奇。甚特。我為諸年少比丘說處及教處。阿難。若汝從如來復[5]問頂法及頂法退者。汝便於如來極信歡喜。

[0565b26] 於是。尊者阿難叉手向佛。白曰。世尊。今正是時。善逝。今正是時。若世尊為諸年少比丘說頂法及頂法退說及教者。我及諸年少比丘從世尊聞已。當善受持。

[0565c01] 世尊告曰。阿難。汝等諦聽。善思念之。我當為汝及諸年少比丘說頂法及頂法退。尊者阿難等受教而聽。

[0565c03] 世尊告曰。阿難。多聞聖弟子真實因心。思念稱量。善觀分別無常。苦。空非我。彼如是思念。如是稱量。如是善觀分別。便生忍。生樂。生欲。欲聞。欲念。欲觀。阿難。是謂頂法。

阿難。若得此頂法復失衰退。不修守護。不習精勤。阿難。是謂頂法退。如是內外識。更樂。覺。想。思。愛。界。因緣起。

阿難。多聞聖弟子此因緣起及因緣起法。思念稱量。善觀分別無常。苦。空。非我。彼如是思念。如是稱量。如是善觀分別。便生忍。生樂。生欲。欲聞。欲念。欲觀。阿難。是謂頂法。

阿難。若得此頂法復失衰退。不修守護。不習精勤。阿難。是謂頂法退。阿難。此頂法及頂法退。汝當為諸年少比丘說以教彼。若為諸年少比丘說教此頂法及頂法退者。彼便得安隱。得力得樂。身心不煩熱。終身行梵行。

[0565c19] 阿難。我為汝等說處及教處。頂法及頂法退。如尊師所為弟子起大慈哀。憐念愍傷。求義及饒益。求安隱快樂者。我今已作。汝等當復自作。至無事處。山林樹下。空安靜處宴坐思惟。勿得放逸。勤加精進。莫令後悔。此是我之教勅。是我訓誨。

[0565c25] 佛說如是。尊者阿難及諸年少比丘聞佛所說。歡喜奉行。

陰。內。外。識。更。覺。想。思。愛。界。因緣。念。正斷
如意。禪。諦。想。無量。無色。種。沙門果。解脫。處。根。力。出要
財。力。覺。道。頂

記《中阿含經卷第五》〈舍梨子相應品第三〉

〈舍梨子相應品成就戒經第二〉

[0449c08] 我聞如是。

[0449c08] 一時。佛遊舍衛國。在勝林給孤獨園。

[0449c09] 爾時。尊者舍梨子告諸比丘。若比丘成就戒。成就定。成就慧者。便於現法出入想知滅定。必有此處。若於現法不得究竟智。身壞命終。過搏食天。生餘意生天中。於彼出入想知滅定。必有此處。

[0449c13] 是時。尊者烏陀夷共在眾中。尊者烏陀夷白曰。尊者舍梨子。若比丘生餘意生天中。出入想知滅定者。終無此處。

[0449c16] 尊者舍梨子再三告諸比丘。若比丘成就戒。成就定。成就慧者。便於現法出入想知滅定。必有此處。若於現法不得究竟智。身壞命終。過搏食天。生餘意生天中。於彼出入想知滅定。必有此處。

[0449c21] 尊者烏陀夷亦復再三白曰。尊者舍梨子。若比丘生餘意生天中。出入想知滅定者。終無此處。

[0449c23] 於是。尊者舍梨子便作是念。此比丘乃至再三非我所說。無一比丘歎我所說。我寧可往至世尊所。

[0449c25] 於是。尊者舍梨子往詣佛所。稽首作禮。却坐一面。尊者舍梨子去後不久。尊者烏陀夷及諸比丘亦往詣佛所。稽首作禮。却坐一面。於中。尊者舍梨子復告諸比丘。若比丘成就戒。成就定。成就慧者。便於現法出入想知滅定。必有此處。若於現法不得究竟智。身壞命終。過搏食天。生餘意生天中。於彼出入想知滅定。必有此處。

[0450a04] 尊者烏陀夷復白曰。尊者舍梨子。若比丘生餘意生天中。出入想知滅定者。終無此處。

[0450a06] 尊者舍梨子復再三告諸比丘。若比丘成就戒。成就定。成就慧者。便於現法出入想知滅定。必有此處。若於現法不得究竟智。身壞命終。過搏食天。生餘意生天中。於彼出入想知滅定。必有此處。

[0450a10] 尊者烏陀夷亦復再三白曰。尊者舍梨子。若比丘生餘意生天中。出入想知滅定者。終無此處。

[0450a13] 尊者舍梨子復作是念。此比丘於世尊前再三非我所說。亦無一比丘歎我所說。我宜默然。

[0450a15] 於是。世尊問曰。烏陀夷。汝說意生天為是色耶。

[0450a16] 尊者烏陀夷白世尊曰。是也。世尊。

[0450a17] 世尊面訶烏陀夷曰。汝愚癡人。盲無有目。以何等故。論甚深阿毘曇。於是。尊者烏陀夷為佛面訶已。內懷憂感。低頭默然。失辯無言。如有所思。

[0450a20] 世尊面訶尊者烏陀夷已。語尊者阿難曰。上尊名德長老比丘為他所詰。汝何以故。縱而不撿。汝愚癡人。無有慈心。捨背上尊名德長老。

[0450a23] 於是。世尊面訶尊者烏陀夷及尊者阿難已。告諸比丘。若比丘成就戒。成就定。成就慧者。便於現法出入想知滅定。必有此處。若於現法不得究竟智。身壞命終。過搏食天。生餘意生天中。於彼出入想知滅定。必有此處。佛說如是。即入禪室。宴坐默然。

[0450a29] 爾時。尊者白淨比丘在於眾中。尊者阿難白尊者白淨。是他所作。而我得責。尊者白淨。世尊晡時必從禪室出。至比丘眾前。敷座而坐。共論此義。尊者白淨應答此事。我極慚愧於世尊所及諸梵行。

[0450b05] 於是。世尊則於晡時從禪室出。至比丘眾前。敷座而坐。告曰。白淨。長老比丘為有幾法。為諸梵行者愛敬尊重。

[0450b08] 尊者白淨白曰。世尊。長老比丘若有五法。為諸梵行者愛敬尊重。云何為五。世尊。長老比丘修習禁戒。守護從解脫。又復善攝威儀禮節。見纖芥罪。常懷畏怖。受持學戒。世尊。禁戒長老上尊比丘。為諸梵行者愛敬尊重。復次。世尊。長老比丘廣學多聞。守持不忘。積聚博聞。所謂法者。初善·中善·竟亦善。有義有文。具足清淨。顯現梵行。如是諸法廣學多聞。翫習至千。意所惟觀。明見深達。世尊。多聞長老上尊比丘。為諸梵行者愛敬尊重。復次。世尊。長老比丘得四增上心。現法樂居。易不難得。世尊。禪伺長老上尊比丘。為諸梵行者愛敬尊重。復次。世尊。長老比丘修行智慧。觀興衰法。得如是智。聖慧明達。分別曉了。以正盡苦。世尊。智慧長老上尊比丘。為諸梵行者愛敬尊重。復次。世尊。長老比丘諸漏已盡。無復有結。心解脫·慧解脫。於現法中自知自覺。自作證成就遊。生已盡。梵行已立。所作已辦。不更受有。知如真。世尊。漏盡長老上尊比丘。為諸梵行者愛敬尊重。世尊。長老比丘若成就此五法。為諸梵行者愛敬尊重。

[0450b29] 世尊問曰。白淨。若長老比丘無此五法。當以何義使諸梵行者愛敬尊重。尊者白淨白曰。世尊。若長老比丘無此五法者。更無餘事使諸梵行愛敬尊重。唯以老耄·頭白·齒落。盛壯日衰。身曲脚戾。體重氣上。柱杖而行。肌縮皮緩。皺如麻子。諸根毀熟。顏色醜惡。彼因此故。使諸梵行愛敬尊重。

世尊告曰。如是如是。若長老比丘無此五法。更無餘事使諸梵行愛敬尊重。唯以老耄·頭白·齒落。盛壯日衰。身曲脚戾。體重氣上。柱杖而行。肌縮皮緩。皺如麻子。諸根毀熟。顏色醜惡。彼因此故。使諸梵行愛敬尊重。

白淨。舍梨子比丘有此五法。汝等應當愛敬尊重。所以者何？白淨。舍梨子比丘修習禁戒。守護從解脫。又復善攝威儀禮節。見纖芥罪。常懷畏怖。受持學戒。

復次。白淨。舍梨子比丘廣學多聞。守持不忘。積聚博聞。所謂法者。初善·中善·竟亦善。有義有文。具足清淨。顯現梵行。如是諸法。廣學多聞。翫習至千。意所惟觀。明見深達。

復次。白淨。舍梨子比丘得四增上心。現法樂居。易不難得。

復次。白淨。舍梨子比丘修行智慧。觀興衰法。得如是智。聖慧明達。分別曉了。以正盡苦。

復次。白淨。舍梨子比丘諸漏已盡。無復有結。心解脫。慧解脫。於現法中自知自覺。自作證成就遊。生已盡。梵行已立。所作已辦。不更受有。知如真。白淨。舍梨子比丘成就此五法。汝等應共愛敬尊重。

[0450c27] 佛說如是。尊者白淨及諸比丘聞佛所說。歡喜奉行。

[0450c29] 〈成就戒經第二竟〉